

PRIJEDLOG

Na osnovu člana 7. stav 2. Zakona o budžetima u Federaciji Bosne i Hercegovine („Službene novine Federacije Bosne i Hercegovine“, broj: 102/13, 9/14, 13/14, 8/15, 91/15, 102/15, 104/16, 5/18, 11/19 i 99/19) i člana 32. stav 1. tačka 2. Statuta Općine Velika Kladuša („Službeni glasnik Općine Velika Kladuša“, broj: 12/11), Općinsko vijeće općine Velika Kladuša na svojoj ____ redovnoj sjednici održanoj _____ 2022. godine, donijelo je

ODLUKU

o izvršavanju budžeta Općine Velika Kladuša za 2022. godinu

I – OPĆE ODREDBE

Član 1.

(Predmet Odluke)

Ovom Odlukom uređuje se struktura prihoda i primitaka, te rashoda i izdataka budžeta općine Velika Kladuša za 2022. godinu (u daljem tekstu: Budžet), način njegovog izvršavanja, prioriteta plaćanja, obim zaduživanja i izdavanja garancija, upravljanje dugom, te finansijskom i nefinansijskom imovinom, prava i obaveze korisnika budžetskih sredstava, ovlaštenja u izvršavanju budžeta za 2022. godinu, kazne za neispunjenje obaveza, te druga pitanja vezana uz izvršenje budžeta.

Član 2.

(Pojam Budžeta)

Budžet je procjena godišnjih prihoda i primitaka, te utvrđenih iznosa rashoda i izdataka, koji na prijedlog Općinskog načelnika donosi Općinsko vijeće. Svaka izmjena i dopuna budžeta vrši se po istom postupku koji se primjenjuje kod usvajanja budžeta.

Član 3.

(Struktura Budžeta)

Budžet se sastoji od općeg i posebnog dijela. Opći dio Budžeta se sastoji od računa prihoda i rashoda, računa kapitalnih primitaka i izdataka, i računa finansiranja, a posebni dio sadrži detaljan raspored izdataka po budžetskim korisnicima i vrsti izdataka.

U bilansu prihoda i izdataka iskazani su porezni i neporezni prihodi i drugi prihodi i primici, te izdaci utvrđeni za finansiranje javnih izdataka na nivou općine Velika Kladuša na osnovu zakonskih i drugih propisa.

Član 4.

(Fiskalna godina)

Budžet se donosi i važi za fiskalnu 2022. godinu (u daljem tekstu: fiskalna godina).

Fiskalna godina počinje 1. januara, a završava 31. decembra 2022. godine.

Član 5.

(Fiskalna odgovornost)

Rukovodilac budžetskog korisnika je odgovoran za:

1. zakonito i namjensko korištenje sredstava i
2. efikasno i uspješno funkcioniranje sistema finansijskog upravljanja i kontrolu u okviru budžetom utvrđenih sredstava.

Rukovodilac je dužan svake godine za prethodnu budžetsku godinu za period u kojem je obavljao poslove rukovodioca popuniti izjavu o fiskalnoj odgovornosti (u daljnjem tekstu: izjava).

Rukovodioci budžetskih korisnika izjavu dostavljaju Službi za finansije, računovodstvo i javne nabavke koja provjerava njen sadržaj, dok rukovodilac Općinskog organa uprave izjavu dostavlja nadležnom Kantonalnom ministarstvu finansija.

Oblik i sadržaj izjave, način popunjavanja i rok predaje izjave, te način i rokove izvještavanja utvrđeni su Pravilnikom o obliku, sadržaju, načinu popunjavanja i predaji izjave o fiskalnoj odgovornosti („Službene novine F BiH“, broj: 34/14).

II – IZVRŠAVANJE BUDŽETA

Član 6.

(Budžetski korisnici)

Budžetski korisnici općine Velika Kladuša su: Jedinствени općinski organ uprave (Općinsko vijeće, Kabinet načelnika i službe općinske uprave), javne ustanove (Centar za socijalni rad i Centar za kulturu i obrazovanje „Zuhdija Žalić“) i Općinsko pravobranilaštvo.

Registar budžetskih korisnika vodi Služba za finansije i računovodstvo po propisanoj budžetskoj klasifikaciji.

Član 7.

(Namjensko korištenje sredstava)

Sredstva Budžeta osiguravaju se budžetskim korisnicima (u daljnjem tekstu: korisnici) koji su u posebnom dijelu budžeta određeni za nosioce sredstava na pojedinim pozicijama.

Korisnici mogu budžetska sredstva koristiti samo za namjene koje su određene budžetom, i to do visine utvrđene u njegovom posebnom dijelu.

Korisnicima nije dozvoljeno da stvaraju obaveze, odnosno rashode ili opterećenje budžetskih pozicija, ako ti rashodi ili opterećenja budžetskih pozicija nisu odobreni u okviru iznosa alociranog za tog korisnika.

Član 8.

(Naplata prihoda)

Budžetski korisnici odgovorni su za potpunu i pravovremenu naplatu prihoda i primitaka iz svoje nadležnosti, za njihovu uplatu u budžet i za izvršavanje svih rashoda i izdataka u skladu sa namjenama.

Budžetski korisnik je dužan provesti sve zakonom propisane radnje radi naplate potraživanja na osnovu ugovora ili bilo kojeg drugog potraživanja na osnovu javnih prihoda.

Za nenaplativa potraživanja Općinski načelnik na obrazloženi prijedlog budžetskog korisnika može donijeti odluku o otpisu potraživanja.

Budžetski korisnici odgovorni su za zakonito, namjensko, efikasno i ekonomično raspolaganje budžetskim sredstvima.

Član 9.

(Način korištenja sredstava Budžeta)

Korisnici koriste sredstva Budžeta u skladu sa svojim godišnjim finansijskim planom, usklađenim sa budžetom, a po dinamici utvrđenoj tromjesečnim i mjesečnim planovima.

Član 10.

(Dinamika odobravanja sredstava)

Korisnici mogu preuzimati obaveze za koje su sredstva namjenski iskazana u posebnom dijelu Budžeta ako je njihovo plaćanje usklađeno s tromjesečnim i mjesečnim planovima za izvršavanje Budžeta.

Iznimno, zbog neusklađenosti priliva sredstava u Budžetu, prema tromjesečnim i mjesečnim planovima izdataka, Služba za finansije, računovodstvo i javne nabavke može izmijeniti dinamiku sredstava pojedinim korisnicima uz saglasnost Općinskog načelnika.

Član 11.

(Priprema operativnih planova)

Služba za finansije, računovodstvo i javne nabavke donosi instrukciju o pripremanju i podnošenju operativnih planova korisnika.

Korisnici sredstava su obavezni Službi za finansije, računovodstvo i javne nabavke dostavljati tromjesečne finansijske planove za izvršavanje budžeta 15 dana prije početka tromjesečja, a do 25-tog u mjesecu dužni su dostavljati prijedlog mjesečnog finansijskog plana za slijedeći mjesec.

Prijedlozi operativnih planova obuhvataju rashode za svaki mjesec.

Ako korisnik sredstava Službi za finansije, računovodstvo i javne nabavke ne podnese prijedlog mjesečnog ili tromjesečnog finansijskog plana u rokovima iz stava 2. ovog člana, mjesečni plan za tog korisnika utvrdit će Služba za finansije, računovodstvo i javne nabavke.

Član 12.

(Nadzor nad izvršenjem)

Rashodi svakog korisnika ne mogu prelaziti iznose alociranih budžetskih sredstava odobrenih za svaki mjesec ili drugi vremenski period koji utvrdi Služba za finansije, računovodstvo i javne nabavke.

Općinski načelnik ima pravo obustaviti od izvršenja svaki akt koji je u suprotnosti sa ovom Odlukom i Zakonom o budžetima u Federaciji Bosne i Hercegovine („Službene novine F BiH“, broj: 102/13, 9/14, 13/14, 8/15, 91/15, 102/15, 104/16, 5/18, 11/19 i 99/19).

Član 13.

(Raspored neplaniranih namjenskih primitaka)

Budžet se izvršava u skladu sa njegovim mogućnostima i dinamikom priliva sredstava.

Ovlašćuje se Općinski načelnik da može izvršiti raspored eventualnih neplaniranih namjenskih prihoda, primitaka i donacija u Budžetu općine Velika Kladuša za 2022. godinu, te da se takva sredstva naknadno prikažu prilikom eventualnog rebalansa Budžeta ili u izvještaju o izvršenju Budžeta kao sastavni dio Budžeta za 2022. godinu.

Donacije, potpore, grantovi koji nisu planirani u budžetu, a ostvare se u toku godine, prikazaće se kao prihod Budžeta i namjenski će se usmjeravati, te će se izvršiti povećanje Budžeta na rashodovnoj strani odnosnog budžetskog korisnika.

Namjenski prihodi i primici koji nisu iskorišteni u prethodnoj godini prenose se u budžet za tekuću budžetsku godinu.

Član 14.

(Postupak nabavke roba, usluga i radova)

Postupak nabavke roba, usluga i radova mora se obavljati u skladu sa odredbama Zakona o javnim nabavkama Bosne i Hercegovine („Službeni glasnik BiH“, broj: 39/14).

Član 15.

(Preraspodjela sredstava)

Općinski načelnik, na prijedlog budžetskog korisnika, može donijeti odluku o prestrukturiranju rashoda u okviru ukupnog iznosa odobrenog za budžetskog korisnika, najviše do 10% ukupno odobrenih rashoda za budžetskog korisnika.

U okviru odobrenog Budžeta, preraspodjela sredstava, najviše do 10% ukupno odobrenih rashoda za budžetskog korisnika iznimno je dozvoljena između budžetskih korisnika, o čemu odlučuje Općinski načelnik na osnovu zahtjeva budžetskog korisnika uz koji se prilaže određena dokumentacija na osnovu koje se daje na uvid razlozi za dodatnim sredstvima na budžetskoj stavci koja se povećava do kraja godine, odnosno razlozi za smanjenje odobrenih budžetskih stavki.

Član 16.

(Uplata javnih prihoda)

Svi javni prihodi i primici budžeta, uključujući i prihode koje korisnici budžeta ostvaruju obavljanjem osnovne djelatnosti po posebnim propisima, uplaćuju se na depozitni račun općine Velika Kladuša i iskazuju se po izvorima iz kojih potiču.

Prihodi ostvareni po osnovu Zakona o zaštiti i spašavanju ljudi i materijalnih dobara od prirodnih i drugih nesreća („Službene novine Federacije BiH“ broj 39/03, 22/06 i 43/10) evidentiraju se na posebnom transakcijskom računu koji je u sastavu jedinstvenog računa trezora i koriste se u skladu sa Odlukom o uvjetima i načinu korištenja sredstava po osnovu posebne naknade za zaštitu od prirodnih i drugih nesreća („Službene novine Federacije BiH“ broj 4/12, 80/13 i 20/20).

Prihodi ostvareni po osnovu naknada za izgradnju skloništa u skladu sa Zakonom o zaštiti i spašavanju ljudi i materijalnih dobara od prirodnih i drugih nesreća („Službene novine Federacije BiH“ broj: 39/03, 22/06 i 43/10) evidentiraju se na posebnom transakcijskom računu koji je u sastavu jedinstvenog računa trezora i koriste se za izgradnju i održavanje javnih skloništa.

Namjenski prihodi i primici koji nisu iskorišteni u prethodnoj godini prenose se u budžet za tekuću budžetsku godinu.

Član 17.

(Povrat više ili pogrešno uplaćenih prihoda)

Povrat više ili pogrešno uplaćenih javnih prihoda u tekućoj godini vrši se na teret odgovarajućih prihoda tekuće godine, iz tekućeg priliva korisnika prihoda, a povrat prihoda koji nisu uplaćeni u tekućoj godini vrši se sa transakcijskih računa korisnika javnih prihoda, u

skladu sa odredbama važećeg Pravilnika o načinu uplate javnih prihoda budžeta i vanbudžetskih fondova na teritoriji Federacije BiH.
Rješenje o povratu više ili pogrešno uplaćenih javnih prihoda, donosi Općinski načelnik, odnosno lice koje on ovlasti, a na osnovu zahtjeva Ministarstva finansija USK-a, pravnog ili fizičkog lica.

Član 18.

(Troškovi službenog puta)

Visina dnevnica, naknada za putne i druge troškove koji nastanu u vezi službenih putovanja, za sve korisnike koji se finansiraju iz sredstava Budžeta općine određuje se na osnovu Uredbe o naknadama troškova za službena putovanja („Službene novine Federacije Bosne i Hercegovine“, broj: 44/16 i 50/16), te Pravilnika o naknadama troškova za službena putovanja („Službeni glasnik općine Velika Kladuša“, broj: 7/18).

Član 19.

(Sredstva za plaće i naknade)

Visina plaće, naknada i drugih ličnih primanja državnih službenika i namještenika Općine Velika Kladuša isplaćivat će se u skladu sa Odlukom Općinskog vijeća o utvrđivanju platnih razreda i koeficijenata za plaće državnih službenika i namještenika u Jedinstvenom općinskom organu uprave općine Velika Kladuša.

Visina plaće, naknade i drugih ličnih primanja Općinskog načelnika, Savjetnika općinskog načelnika, Predsjedavajućeg Općinskog vijeća i Općinskog pravobranioca isplaćivat će se u skladu sa Odlukom Općinskog vijeća o plaćama, naknadama izabranih zvaničnika, nosioca izvršnih funkcija i savjetnika profesionalno angažiranih u Jedinstvenom općinskom organu uprave općine Velika Kladuša.

Član 20.

(Naknade općinskim vijećnicima)

Naknada za vršenje funkcije vijećnika u Općinskom vijeću i radnim tijelima vijeća, te pravo na dnevnicu i putne troškove vijećnika isplaćivat će se u skladu sa Odlukom Općinskog vijeća o visini naknada koje se isplaćuju općinskim vijećnicima („Službeni glasnik općine Velika Kladuša“, broj: 4/10).

Član 21.

(Tekuća budžetska rezerva)

Sredstva tekuće rezerve planirana u budžetu koriste se za:

- a) Nepredviđene namjene za koje u budžetu nisu planirana sredstva ili za namjene koje se tokom godine pokaže da za njih nisu utvrđena dovoljna sredstva jer ih pri planiranju budžeta nije bilo moguće predvidjeti.
- b) Finansiranje hitnih i nepredviđenih izdataka za sponzorstva i pokroviteljstva, kada se kao sponzor ili pokrovitelj pojavljuje općina Velika Kladuša.
- c) Finansiranje dijela hitnih i nepredviđenih troškova za učešće pojedinaca i udruženja građana ili sportskih klubova sa područja Općine na svjetskom, evropskom i državnim takmičenjima, manifestacijama i skupovima, ako se takvo učešće nije moglo predvidjeti na početku fiskalne godine.
- d) U drugim slučajevima kada Općinski načelnik utvrdi da je korištenje sredstava budžetske rezerve za pokriće hitnih i nepredviđenih izdataka od interesa za Općinu a od koristi licima koja su bolesna, u stanju socijalne potrebe i sl.

O korištenju sredstava tekuće rezerve, na osnovu pojedinačnih zahtjeva odlučuje Općinski načelnik donošenjem zaključka o odobravanju sredstava budžetske rezerve, a na osnovu Pravilnika o korištenju sredstava tekuće rezerve.

Sredstva tekuće rezerve iz stava 1. ovog člana mogu iznositi najviše do 3 % budžetskih prihoda bez namjenskih prihoda, vlastitih prihoda i bez primitaka.

Općinski načelnik kvartalno izvještava Općinsko vijeće o korištenju sredstava tekuće rezerve Budžeta kroz periodične izvještaje o izvršenju budžeta.

Član 22.

(Održavanje čistoće javne higijene)

Sredstva predviđena u Budžetu općine za finansiranje usluga održavanja čistoće javne higijene, održavanja javnih saobraćajnih površina, održavanje grada u zimskom periodu, održavanje gradskog groblja - nepredviđeni radovi vršit će se prema Programu Zajedničke komunalne potrošnje za 2022. godinu kojeg usvaja Općinsko vijeće na prijedlog Općinskog načelnika, a poslove obavlja JKUP „Komunalije“ doo Velika Kladuša.

Sredstva za održavanje javne rasvjete predviđena u budžetu općine za 2022. godinu koristit će se za održavanje javne rasvjete i potrošnju električne energije u skladu sa Programom Zajedničke komunalne potrošnje za 2022. godinu, a na osnovu Ugovora o održavanju javne rasvjete koji potpisuje Općinski načelnik sa JKUP „Komunalije“ doo Velika Kladuša.

Član 23.

(Održavanje lokalnih puteva u zimskom periodu)

Sredstva predviđena u Budžetu općine za finansiranje održavanja lokalnih puteva u zimskom periodu vršit će se prema Programu Zajedničke komunalne potrošnje za 2022. godinu, a izvršava ga JKUP „Komunalije“ doo Velika Kladuša.

Član 24.

(Ugovorene i druge posebne usluge)

Sredstva utvrđena u Budžetu, pozicija: Ostale stručne usluge – IG doo Banjaluka (Institut za građevinarstvo doo Banjaluka) koristit će se za troškove davanja mišljenja nosioca izrade planske dokumentacije u postupku izdavanja urbanističke saglasnosti.

Sredstva utvrđena u Budžetu kao izdaci za rad komisija koristiće se za isplatu naknada članovima komisija organizovanih za obavljanje poslova u skladu sa aktom Općinskog načelnika ili Općinskog vijeća, a na osnovu podnesenog izvještaja o radu komisije.

Sredstva utvrđena u Budžetu, pozicija „Izrada projektne dokumentacije i usluge nadzora nad projektima“ koristit će se za finansiranje projektne dokumentacije i usluga nadzora nad izvođenjem radova za projekte koji nisu direktno vezani za kapitalni projekat planiran budžetom, a u skladu sa potpisanim ugovorom, nakon provedenog postupka javne nabavke.

Sredstva za obavljanje hitnih intervencija na zgradama utvrđena u Budžetu će se koristiti na osnovu Pravilnika koji donosi Općinski načelnik, a u skladu sa Zakonom o korištenju, upravljanju i održavanju zajedničkih dijelova i uređaja zgrada.

Član 25.

(Grantovi nižim nivoima vlasti)

Sredstva utvrđena u Budžetu, pozicija „Grant mjesnim zajednicama (provođenje izbora)“ koristit će se za finansiranje provođenja izbora u mjesnim zajednicama u skladu sa Odlukom Općinskog vijeća, na osnovu prijedloga Općinskog načelnika.

Sredstva utvrđena u Budžetu, pozicija: „Transfer za kulturu“ koristit će se za finansiranje radova čišćenja i restauracije starih gradova u skladu sa namjenom za koju su namjenska sredstva dobijena.

Sredstva utvrđena u Budžetu, pozicija „Transfer za izbore – Općinska izborna komisija“ koristit će se za finansiranje naknada za rad Općinske izborne komisije, u skladu sa Odlukom Centralne izborne komisije o visini naknade za rad članova izborne komisije, te naknada za rad biračkih odbora i drugih troškova nastalih u postupku provođenja općih izbora.

Sredstva utvrđena u Budžetu, pozicija: „Transfer za razvoj turizma“ koristit će se za razvoj i unapređenje turističke ponude općine Velika Kladuša u skladu sa Zakonom o turizmu („Službeni glasnik USK-a“, broj: 25/20).

Član 26.

(Grantovi pojedincima)

Sredstva utvrđena u Budžetu, pozicija: „Jednokratna socijalna davanja“ koristit će se za finansiranje liječenja pojedinaca i drugih socijalnih potreba, a na osnovu Pravilnika o ostvarivanju prava na socijalna davanja koji donosi Općinski načelnik.

Sredstva utvrđena u Budžetu, pozicija „Izdaci za raseljena lica – alternativni i nužni smještaj“ koristit će se za finansiranje alternativnog i nužnog smještaja u skladu sa Zakonom o raseljenim osobama i povratnicima u FBiH, a na osnovu zaključaka Općinskog načelnika.

Raspodjela sredstava u okviru razdjela 10, ekonomski kod 614234 – Isplate stipendija vršit će se prema Pravilniku o dodjeli stipendija koji je, na prijedlog Općinskog načelnika usvojilo Općinsko vijeće.

Raspodjela sredstava u okviru razdjela 10, ekonomski kod 614239-002 – Materijalno obezbjeđenje za učesnike NOR-a vršit će se u skladu sa Odlukom Općinskog vijeća o osnovnom obezbjeđenju boraca narodnooslobodilačkog rata općine Velika Kladuša („Službeni glasnik općine Velika Kladuša“, broj: 4/99).

Sredstva utvrđena u Budžetu, pozicija „Sredstva za finansiranje troškova za socijalne kategorije građana“ koristit će se za finansiranje troškova građana u stanju socijalne potrebe kao što su priključak na komunalnu infrastrukturu (voda, struja, smeće i dr.), kao i druge troškove koje građani u stanju socijalne potrebe ne mogu sami finansirati (nabavka materijala za popravak stambenog objekta, troškove ostalog građevinskog materijala, troškove popravke, zamjene stolarije i sl.). Trošak će se priznavati na osnovu odluke Općinskog načelnika.

Sredstva utvrđena u Budžetu, pozicija Transfer za posebne namjene – elementarne nepogode su namjenska sredstva za zaštitu i spašavanje, koja se prikupe u tekućoj godini kao i sredstva akumulirana iz prethodnih godina, a koriste se u skladu sa Zakonom o zaštiti i spašavanju ljudi i materijalnih dobara od prirodnih i drugih nesreća („Službene novine FBiH“, broj: 39/03 i 22/06) i Odlukom o uslovima i načinu korištenja sredstava ostvarenih po osnovu posebne naknade za zaštitu od prirodnih i drugih nesreća („Službene novine FBiH“, broj: 4/12, 80/13 i 20/20), a na osnovu godišnjeg plana korištenja sredstava za zaštitu i spašavanje, kojeg izrađuje Služba za civilnu zaštitu, uz Odluku Općinskog štaba civilne zaštite, na osnovu pojedinačnih odluka Općinskog načelnika.

Sredstva predviđena na kodu „Transfer za posebne namjene – elementarne nepogode, učešće općine“ će se koristiti za sufinansiranje projekata otklonjanja posljedica elementarne nepogode, u skladu sa zaključcima Općinskog načelnika, a na osnovu prijedloga Službe za civilnu zaštitu.

Sredstva utvrđena u Budžetu za sufinansiranje troškova prijevoza učenika koristit će se za subvencioniranje prijevoza učenika na osnovu Odluke Općinskog vijeća („Službeni glasnik općine Velika Kladuša“, broj: 10/19).

Član 27.

(Grantovi neprofitnim organizacijama)

Sredstva utvrđena u Budžetu, pozicija „Grant za razvoj poljoprivrede“ koristiće se za podršku primarnoj poljoprivrednoj proizvodnji. Način realizacije ovih sredstava utvrđen je posebnim Programom koji donosi Općinski načelnik, na prijedlog nadležne službe.

Sredstva utvrđena u Budžetu, pozicija „Grant za sufinansiranje projekata mladih“ koristit će se za sufinansiranje projekata mladih s područja općine, a u skladu sa odlukom koju donosi Općinski načelnik na prijedlog nadležne službe.

Sredstva utvrđena u Budžetu, pozicija „Grant za kulturne i sportske manifestacije - Dani poljoprivrede“ koristit će se za sufinansiranje manifestacija od značaja za općinu Velika Kladuša, a na osnovu programa kojeg donosi Organizacioni odbor za obilježavanje manifestacije, a odobrava Općinski načelnik.

Sredstva utvrđena u Budžetu, pozicija „Grant za sportski savez“ koristit će se u skladu sa Odlukom Općinskog načelnika, uz Program i finansijski plan Sportskog saveza općine Velika Kladuša. Na kriterije za raspodjelu sredstava saglasnost daje Općinsko vijeće općine Velika Kladuša.

Sredstva utvrđena u Budžetu, pozicija „Grant za sufinansiranje razvojnih projekata i projekata EU“ koristit će se za finansiranje projekata prekogranične saradnje (Interreg – IPA CBC) iz sredstava EU.

Sredstva utvrđena u Budžetu, pozicija „Grant za Crveni križ“ koristit će se za sufinansiranje Općinskog crvenog križa Velika Kladuša u skladu sa Zakonom o crvenom križu Federacije BiH („Službene novine F BiH“, broj: 28/06), a raspoređivat će se na osnovu pismenog zahtjeva Crvenog križa u skladu sa zaključkom Općinskog načelnika.

Sredstva utvrđena u Budžetu, pozicija „Grant za učenike generacije“ koristit će se u skladu sa zaključcima Općinskog načelnika.

Sredstva utvrđena u Budžetu, pozicija: JKUP "Komunalije" doo Velika Kladuša, sredstva za funkcionisanje i rad privremenog skloništa za životinje koristit će se za finansiranje rada Azila za životinje na osnovu ugovora potpisanog između općine Velika Kladuša i JKUP „Komunalije“ doo Velika Kladuša.

Sredstva utvrđena u Budžetu, pozicija: „Grant za kulturne i sportske manifestacije, 4 kladuška doba,“ koristit će se za finansiranje manifestacija tokom godine, a na osnovu programa kojeg donosi Organizacioni odbor za obilježavanje manifestacije, kojeg imenuje Općinski načelnik.

Sredstva utvrđena u Budžetu, pozicija: Grant za sufinansiranje programa uključivanja dijaspore i finansiranja biznisa koristit će se za sufinansiranje zajedničkog fonda Općine Velika Kladuša i Fondacije Mozaik a radi financijske podrške biznis idejama na području općine.

Sredstva utvrđena u Budžetu, pozicija: Grant za vijeće mladih općine Velika Kladuša koristit će se za finansiranje troškova zakupa prostora za vijeće mladih u objektu vlasništva JKP „Vodovod i kanalizacija“ doo Velika Kladuša.

Sredstva utvrđena u Budžetu, pozicija „Tekući transfer za parlamentarne političke partije“ rasporedit će se na korisnike u skladu sa utvrđenim procentualnim rasporedom iz Zakona o finansiranju političkih stranaka na nivou BiH („Službeni glasnik BiH“, broj: 95/12 i 41/16), i to:

- a) 30% odobrenih sredstava dijeli se jednako svim političkim subjektima/nezavisnim kandidatima u trenutku isplate sredstava
- b) 60% sredstava dijeli se prema ukupnom broju osvojenih mandatnih mjesta, koje svaka politička stranka odnosno nezavisni kandidat ima u trenutku isplate sredstava
- c) 10% od ukupnog iznosa raspoređuje se na političke stranke odnosno nezavisne kandidate srazmjerno broju mandata koja pripadaju manje zastupljenom spolu.

Prema utvrđenom kriteriju iz prethodnog vrši se isplata i nezavisnim vijećnicima, s tim što se prije prenosa sredstava na račun fizičkog lica obračunavaju i obustavljaju odgovarajući porezi i doprinosi u skladu sa zakonskim propisima.

Sredstva utvrđena u Budžetu, pozicija „Tekući transfer udruženjima građana“ koristit će se za sufinansiranje projekata udruženja građana sa područja Općine (udruženja invalida, oboljelih, osoba sa posebnim potrebama, kulture, sporta i mladih, boračkih udruženja, osoba u stanju socijalne potrebe kroz projekte nevladinih i humanitarnih organizacija i druga udruženja građana koja štite ostala prava građana), a u skladu sa Odlukom koju donosi Općinski načelnik na prijedlog nadležne službe.

Sredstva utvrđena u Budžetu, pozicija „Sredstva za finansiranje projekta sanacije općinske deponije“, koristit će JKUP „Komunalije“ doo Velika Kladuša za radove sanacije deponije, po osnovu naloga Općinskog načelnika.

Sredstva utvrđena u Budžetu, pozicija „Sredstva za finansiranje projekta saniranje divljih deponija“ koristit će se za finansiranje projekta „April mjesec čistoće“ odnosno drugih troškova u vezi sa sanacijom divljih deponija na području općine Velika Kladuša.

Sredstva utvrđena u Budžetu, pozicija: Grant za utopljanje zgrada koristit će se finansiranje projekata utopljanja zgrada na osnovu internih akata Općinskog načelnika i nadležne službe.

Sredstva utvrđena u Budžetu, pozicija „Sredstva za finansiranje projekta uređenja nereguliranog korita rijeke Kladušnice“ koristit će se u skladu sa potpisanim ugovorima nakon provedenog postupka javne nabavke na osnovu odluka Općinskog načelnika.

Sredstva utvrđena u Budžetu, pozicija: „Sredstva za finansiranje izgradnje skloništa – namjenska sredstva koristit će se za tekuće održavanje postojećih skloništa u skladu sa potpisanim ugovorima nakon provedenog postupka javne nabavke na osnovu odluka Općinskog načelnika.

Sredstva utvrđena u Budžetu, pozicija: „Sredstva za finansiranje troškova održavanja retencionih jezera“ koristit će se za tekuće održavanje retencijskih jezera na osnovu odluka Općinskog načelnika.

Korisnici budžetskih sredstava (boračka udruženja, udruženja iz oblasti sporta i kulture i ostale organizacije i udruženja) dužni su, po okončanju projekta ili realizaciji odobrenih sredstava dostaviti nadležnoj službi izvještaj (narativni i finansijski) o namjenskom utrošku sredstava sa odgovarajućom finansijskom dokumentacijom, a najkasnije do okončanja budžetske godine, što je preduslov za dalje finansiranje.

U slučaju nepoštivanja odredbi iz ovog člana, Općinski Načelnik može svojom Odlukom zaustaviti finansiranje korisniku budžetskih sredstava za tekuću godinu, odnosno isti ne mogu biti korisnici budžetskih sredstava za narednu godinu.

Za korisnike sredstava po grantovima koji dodijeljena sredstva ne utroše u skladu sa namjenom za koju su odobrena i ne dostave adekvatan izvještaj, pokrenuće se postupak povrata sredstava u budžet.

Član 28.

(Subvencije javnim preduzećima)

Sredstva utvrđena u Budžetu „Subvencije javnim preduzećima“ koriste se u skladu sa usvojenim budžetom tj. javno preduzeće Veterinarska stanica koristi sredstva za slijedeće namjene:

1. Sufinansiranje projekta kastracije pasa lotalica u skladu sa internim aktom koji donosi Općinski načelnik na prijedlog Službe za poduzetništvo, lokalni razvoj i implementaciju projekata.
2. Sufinansiranje provođenja monitoringa zaraznih bolesti goveda u skladu sa internim aktom koji donosi Općinski načelnik na prijedlog Službe za poduzetništvo, lokalni razvoj i implementaciju projekata.
3. Subvencije za veterinarstvo, predviđenim sredstvima sufinansira se izdavanje potvrde o provedenim obaveznim mjerama zaštite životinja (goveda) za poljoprivrednike.

Javno preduzeće Radio televizija Velika Kladuša koristi sredstva za sufinansiranje rada RTV Velika Kladuša, u skladu sa Programom kojeg odobrava Općinski načelnik.

Sredstva utvrđena u Budžetu na poziciji: JKUP „Komunalije“ doo Velika Kladuša – realizacija razvojnih projekata JKUP Komunalije i zavisnih društava“ koristit će se za realizaciju razvojnih projekata javnog komunalnog uslužnog preduzeća i zavisnih društava, u skladu sa posebnim programom Općinskog načelnika.

Sredstva utvrđena Budžetom za Javno komunalno preduzeće „Vodovod i kanalizacija“ doo Velika Kladuša koristit će se za sufinansiranje izgradnje vodovodne mreže u skladu sa zahtjevom javnog preduzeća a kojeg odobrava Općinski načelnik.

Član 29.

(Subvencije privatnim preduzećima i poduzetnicima)

Sredstva utvrđena u Budžetu, pozicija: Subvencije za veterinarstvo, privatna veterinarska stanica koriste se za sufinansiranje izdavanja potvrde o provedenim obaveznim mjerama zaštite životinja (goveda) za poljoprivrednike, koje izdaje privatna veterinarska stanica, a odobravat će

ih Općinski načelnik na osnovu akata nadležne Službe za poduzetništvo, lokalni razvoj i implementaciju projekata.

Sredstva utvrđena u Budžetu, pozicija: Subvencije obrtnicima i poduzetnicima koristiti će se u skladu sa Programom kojeg donosi Općinski načelnik na prijedlog nadležne službe.

Član 30.

(Drugi tekući rashodi)

Sredstva utvrđena u Budžetu, pozicija: „Ostali tekući rashodi, nabavka adresnih pločica“ koristit će se za nabavku i ugradnju adresnih pločica na objekte fizičkih i pravnih lica na osnovu zaključenih ugovora sa odabranim ponuđačem, nakon provođenja postupka javne nabavke.

Sredstva utvrđena u Budžetu, pozicija: „Subvencioniranje troškova i održavanje zgrade za socijalne kategorije“ koristit će se za troškove koje će Općina snositi za objekat zgrade za socijalne kategorije koja je izgrađena u sklopu projekta CEB II.

Član 31.

(Kapitalni transferi - grantovi)

Sredstva utvrđena u budžetu, pozicija: „Projekat razvoja poljoprivrede socijalno ugroženih kategorija stanovništva – koristit će se za sufinansiranje projekata poljoprivrede pojedinačnim poljoprivrednim proizvođačima socijalno ugroženih kategorija stanovništva, preko Opće kladuške zadruge, uz saradnju Federalnog ministarstva poljoprivrede, vodoprivrede i šumarstva i sufinansiranje međunarodnog fonda IFAD.

Sredstva utvrđena u Budžetu, pozicija: „Kapitalni transferi javnim preduzećima“ podrazumijevaju isplatu sredstava ekoloških naknada koja se obezbjeđuje od nadležnog kantonalnog ministarstva a realiziraju putem javnih preduzeća ili javnih ustanova uz učešće dijela budžetskih sredstava. Isplate će se vršiti nakon izvršenih radova u skladu sa potpisanim ugovorima o provedenim postupcima javnih nabavki.

Sredstva utvrđena u Budžetu, pozicija: Nabavka i izgradnja hidranata putem JKP „ViK“ doo Velika Kladuša koristit će se za izgradnju hidranata na odabranim mjestima, a poslove će izvršavati javno preduzeće Vodovod i kanalizacija Velika Kladuša.

Sredstva utvrđena u Budžetu, pozicija: Sufinansiranje projekta izgradnje gradske tržnice koristit će se za finansiranje troškova izgradnje gradske tržnice putem JKUP „Komunalije“ doo Velika Kladuša.

Sredstva utvrđena u budžetu, pozicija: Sufinansiranje izgradnje školskih objekata koristit će se za sufinansiranje projekata izgradnje školskih objekata, a u skladu sa odlukom koju donosi Općinski načelnik na prijedlog nadležne službe.

Član 32.

(Nabavka zemljišta i ostalih materijalnih sredstava)

Sredstva utvrđena u Budžetu, pozicija „Sredstva eksproprijacije“ koristit će se za rješavanje imovinsko pravnih odnosa, a na osnovu postignutih sporazuma o otkupu zemljišta vršit će se isplate fizičkim i pravnim licima u skladu sa zaključcima Općinskog načelnika.

Član 33.

(Nabavka građevine)

Sredstva utvrđena u Budžetu, pozicija „Izgradnja zgrade za socijalne kategorije - CEB II projekat“ koristit će se za sufinansiranje projekta izgradnje stambene zgrade kolektivnog stanovanja za korisnike kolektivnih centara i alternativnog smještaja.

Sredstva utvrđena u Budžetu, pozicija „Izgradnja skloništa – namjenska sredstva za izgradnju skloništa“ koristit će se za finansiranje projekta izgradnje skloništa u skladu sa zakonskim propisima koji definišu pravila i način trošenja namjenskih sredstava za skloništa.

Sredstva utvrđena u Budžetu, pozicija: „Izgradnja parking nadstrešnica i autobuskih stajališta sa fotonaponskim ćelijama“ koristit će se za izgradnju parking nadstrešnica u okviru INGRID projekta. Isplate će se vršiti na osnovu potpisanih ugovora nakon provedenih postupaka javnih nabavki.

Sredstva predviđena na ekonomskom kodu Izgradnja vanjske rasvjete koristit će se za izgradnju nove mreže javne rasvjete, nakon provedenog postupka javne nabavke, u skladu sa Zakonom o javnim nabavkama BiH, kojeg provodi Jedinostveni općinski organ uprave.

Član 34.

(Nabavka opreme)

Sredstva utvrđena u budžetu, pozicija „Namještaj, kompjuterska oprema, ostale kancelarijske mašine, motorna vozila“ koristit će se za finansiranje nabavke opreme, izvršavat će se u skladu sa potpisanim ugovorima nakon provedenog postupka javne nabavke na osnovu odluka Općinskog načelnika.

Član 35.

(Nabavka stalnih sredstava u obliku prava)

Sredstva utvrđena u budžetu, pozicija „Ulaganja u tuđa stalna sredstva - izgradnja objekata mjesnim zajednicama“ koristit će se za finansiranje projekata izgradnje objekata mjesnim zajednicama, a izvršavat će se u skladu sa potpisanim ugovorima nakon provedenog postupka javne nabavke na osnovu odluka Općinskog načelnika.

Sredstva utvrđena u budžetu, pozicija „Izrada prostorno planske dokumentacije“ koristit će se za finansiranje projekata izrade prostorno planske dokumentacije, a izvršavat će se u skladu sa potpisanim ugovorima nakon provedenog postupka javne nabavke na osnovu odluka Općinskog načelnika.

Član 36.

(Rekonstrukcija i investiciono održavanje)

Sredstva utvrđena u budžetu, pozicija „Finansiranje investicionog održavanja, zaštite, rekonstrukcije i izgradnje lokalnih cesta, gradskih ulica i nerazvrstanih cesta“ koristit će se za finansiranje projekata putne i ostale infrastrukture, a izvršavat će se u skladu sa potpisanim ugovorima nakon provedenog postupka javne nabavke na osnovu odluka Općinskog načelnika.

Sredstva utvrđena u budžetu, pozicija: „Rekonstrukcija zgrade organa uprave“ koristit će se za rekonstrukciju unutrašnjeg prostora zgrade općine, a izvršavat će se u skladu sa potpisanim ugovorom sa izvođačima radova nakon provedenog postupka javne nabavke.

Sredstva utvrđena u budžetu, pozicija: „Rekonstrukcija zgrade JU Centar za kulturu i obrazovanje“ koristit će se za nastavak izgradnje objekta javne ustanove, a izvršavat će se u

skladu sa potpisanim ugovorom sa izvođačima radova nakon provedenog postupka javne nabavke.

Sredstva utvrđena u budžetu, pozicija: „Projekat regulacije i kanalizacije“ koristit će se za finansiranje regulacije riječnih korita odnosno za provođenje projekta kanalizacije iz namjenskih sredstava dobijenih od viših nivoa vlasti. Trošenje ovih sredstava vrši se na osnovu potpisanih ugovora sa izvođačem radova nakon provedenog postupka javne nabavke.

Sredstva utvrđena u budžetu, pozicija: „Investiciono održavanje zemljišta – vanjsko osvjetljenje i pločnici (Uređenje parking prilaza zgradama Mekote)“ koristit će se za investiciono ulaganje u parking prilaze zgradama Mekote, a izvršavat će se u skladu sa potpisanim ugovorom sa izvođačem radova nakon provedenog postupka javne nabavke.

Sredstva utvrđena u budžetu, pozicija: „Investiciono održavanje zemljišta – vanjsko osvjetljenje i pločnici (Uređenje gradskog parka)“ koristit će se za troškove projektovanja donjeg dijela gradskog parka, a izvršavat će se u skladu sa potpisanim ugovorom sa izvršiocem usluge nakon provedenog postupka javne nabavke.

Član 37.

(Izdaci za finansijsku imovinu)

Sredstva utvrđena u budžetu, pozicija: „Pozajmljivanje javnim preduzećima“ koristit će se za date kratkoročne pozajmice javnim preduzećima na osnovu zaključenog ugovora između Općinskog načelnika i direktora javnog preduzeća, čiji rok vraćanja je najduže do kraja budžetske godine, tj. do 31.12.2022. godine.

Član 38.

(Izdaci za otplate dugova)

Sredstva utvrđena u budžetu, pozicija: „Otplate kredita domaćim finansijskim institucijama“ koristit će se za otplate kredita EIB-a koji je zaključen sa Federalnim ministarstvom finansija radi realizacije projekta kanalizacije.

Član 39.

(Naredbodavac budžeta)

Za izvršenje Budžeta u cjelini je odgovoran Općinski načelnik Općine Velika Kladuša koji je i naredbodavac po Budžetu, a u slučaju privremene spriječenosti Općinskog načelnika za izvršenje Budžeta, odgovorno je lice koje Općinski načelnik ovlasti da ga privremeno zamjenjuje.

Član 40.

(Odgovornost za sredstva Budžeta)

Za zakonitu upotrebu sredstava koja se budžetom rasporede budžetskim korisnicima ili ostalim korisnicima budžetskih sredstava odgovorni su rukovodioci istih korisnika.

Član 41.

(Prioriteti izvršavanja budžeta)

U slučaju da tokom godine zbog neravnomjernosti prihoda Budžeta ili drugih nepredviđenih okolnosti Budžet privremeno dođe u poziciju da ne može redovno izvršavati predviđene obaveze, finansiranje se vrši po prioritetima.

Redoslijed prioriteta iz prethodnog stava:

1. Prenijete nepodmirene obaveze iz prethodnih godina,
2. Dospjele obaveze po kreditima,
3. Plaće sa porezima i doprinosima zaposlenih korisnika budžeta i paušali vijećnika,
4. Materijalna potrošnja budžetskih korisnika,
5. Druge dospjele obaveze prema poslovnim partnerima,
6. Obaveze prema korisnicima grantova.

Član 42.

(Zaduživanje i upravljanje dugom)

Općina Velika Kladuša može se zadužiti i izdati garancije u svrhe, na način, pod uvjetima i u obimu propisanim zakonom kojim se uređuje dug, zaduživanje i garancije u F BiH.

III – ZAVRŠNE ODREDBE

Član 43.

(Priznavanje prihoda i rashoda)

Prihodi i rashodi budžeta evidentiraju se po modificiranom računovodstvenom osnovu nastanka događaja, što znači da se prihodi evidentiraju u razdoblju u kojem postaju raspoloživi i mjerljivi, a rashodi se priznaju u trenutku nastanka obaveze.

Budžetski korisnici i šefovi službi odgovorni su za naplatu i ubiranje prihoda u svojoj nadležnosti i za izvršavanje svih izdataka u skladu sa namjenama.

Član 44.

(Primjena drugih propisa)

Na sva pitanja koja nisu regulisana ovom Odlukom, a tiču se načina izrade, donošenja, izvršavanja Budžeta, zaduživanja, duga, računovodstva, nadzora i revizije Budžeta, primjenjivat će se odredbe važećih zakonskih propisa.

Član 45.

(Kaznene odredbe)

Odgovorno lice budžetskog korisnika, nosilac izvršne vlasti, kao i drugo lice odgovorno za Budžet općine kaznit će se za prekršaj ove Odluke saglasno sa odredbama člana 102. i 103. Zakona o budžetima u F BiH („Sl. novine F BiH“, broj: 102/13).

Član 46.

(Stupanje na snagu Odluke)

Ova Odluka stupa na snagu danom donošenja, ima se objaviti u „Službenom glasniku općine Velika Kladuša“, a ista se odnosi na fiskalnu 2022. godinu i primjenjuje se od 01.01.2022. godine do 31.12.2022. godine.

Obradivač:
Služba za finansije, računovodstvo i
javne nabavke

Predlagač: Općinski načelnik